



25263

Mag. St. Dr.

P

et miracula beati
ta (Esaiæ Loloni.
1772. I. 65.
fic Nil. Lobn. 1670

25263

4232.

t

VITA ET MIRACVLA
BEATI ESAIÆ POLONI

S. Theol. Doct: Ord: Eremit.

S. Augustini. 25263



EATVS Esaias, natione Polonus, Confessor DEI dilectus, Anno à Partu Virginis 1380. Casimiro Magno Regnum Poloniae gubernante, nobilibus imprimis & Religionis Catholicae amantissimis parentibus, Cracouiae in platea arcensi feliciter est in hanc lucem editus. Patri fuisse nomen Floriano Bonero ferunt, Mater Bronislavva Lanckorunska de Brzezie vocabatur, pietate, ardenti in DEVM charitate, caeteris que virtutibus ornatissima, familia antiqua, ac de Repub. pace & bello, terra mari que optimè merita, matrona clarissima. Puerulus vbi aetatem commodiorem attigit, eam potissimum, quae studia Artium liberalium requirit, parentum cura singulari, optimis est in Academia Cracouien. traditus praceptoribus, ipse quoque praclaro, & verè diuino à natura ornatus instructus que ingenio, satis alacriter se ad eam accinxit palæstram. Breui ergo tempore eam sibi Doctrinae comparauit suppelle-

ctilem, vt beatam illam Encyclopœdiam, siue Orbem scientiarum assequutus videretur. Verum enim vero, tantus vir, diligenter & sæpe cogitabat, huius Mundi sapientiam omnem durabilem non esse, neque quidquam æternitatis in se continere, ac proinde etiam atque etiam dispiciebat, quoniam potissimum tramite: qua via incederet. Erat tunc temporis Casimiræ ad Cracouiam Ordinis nostri Monasterium augustissimum, viris religiosissimis, integerrimis, eruditissimis frequentissimum, opinione sincerae sanctimoniam apud omnes tam indigenas, quàm aduenas celeberrimum, vbi publicè in Gymnasijs omnes scientiæ, summo labore, summa diligentia, ab eisdem Patribus tanquam Athenis tractabantur. Quò cum se ille contulisset, Tituloque Doctoratus diebus consequentibus maxima omnium acclamatione insignitus esset, & lectionibus omni genere eruditionis refertissimis, & publicis disputationibus subtilissimis admirationem, reuerentiam, amorem in mentibus omnium facilè sibi conciliabat. Fit sanè plerumque, vt literis ornatos homines parum decentibus cultos moribus videamus, cum & scientiam inflare dicat sanctus Apostolus, & non ita multi sint, qui sublimiori altaque naturæ cognitione subnixi, inferiora, seque diligenter contemplantur. At non ita B. Esaias. Nam in primis, quantum ad

Monasticen attinet, nihil illo in demissione animi studiosius, nihil in Oratione, siue Mentali, siue Vocali ardentius, nihil in reliquo præstantissimarum virtutum cursu foeliciter conficiendo diligentius vnquam fuit. Idem Legum & Sanctionum Religionis obseruantissimus, disciplinæ Ordinis Eremitani custos zelosissimus, laborum patientissimus, in omni vitæ seriè adeò vigilans, sedulus, & foelix: vt illud Dauidicum meritò de illo dici possit & debeat: Erat tanquam lignum iuxta decursus aquarum plantatum, quod fructum suum in tempore suo dabat semper, folium eius nullum vnquam defluxit, omnia in quibus operam suam collocabat, cesserunt foelicissimè. Nullibi ille in Oratione frequentior, ac ante imaginem MATRIS MISERICORDIÆ, vbi non rarò cœlesti circumfusus luce, in aërem subleuabatur, voce submissa cantans: AVE REGINA CAELORVM. Sanè ætas illa florentissima qua vixit, plurimos viros sanctitatis laude illustres & conspicuos habuit, quorū ille familiaritate quotidiana fruebatur. Erat enim

Beatus Stanislaus Casimiritanus, Ordinis Canoniorum Regularium S. Augustini, in Monasterio Cracouien. ibidem Casimiræ ad Ecclesiam Corporis Christi sito, cuius ad DEVM precibus, plurimi iam mortales, in periculis & angustiis suis, certissima retulerunt adiumenta.

Beatus quoque Ioannes Cantius S. Theolog. Doctor, ac eiusdem in alma Cracouiensi Academia nobilissimus & clarissimus Professor, cuius sanctimoniam tam cum viueret, quam post decessum infinita propè, ac verè admirabilia patrata testantur miracula. Præterquam enim, quòd plurimos siue aliqua vitæ infelicitate obrutos subleuauerit, mortuos viginti quatuor excitauit, pristinaeque vitæ reddidit.

Tum Beatus Suentoslaus Slauouien. Ecclesiæ in foro B. MARIAE Virginis in hac vrbe Mansionarius piissimus, vltimarumque voluntatû exequutor fidelissimus, visionibus diuinis inprimis clarus, qui perpetuum in vita coluit tenuitque silentium.

Præterea B. Michaël nobilis Lituanus, Ordinis S. MARIAE de Metri, de poenitentia SS. Martyrum ad S. Marcum, qui & quatuor mortuos suscitauit, & alijs plurimis miraculis claret.

Postremò B. Simon Lipnicensis Ordinis S. Francisci de Obseruantia, qui præter alia admiranda, quæ per eum diuina virtus operata est, decem mortuos resuscitauit.

Hi sunt inquam viri misericordiæ & pietatis, cum quibus Esaias familiariter vixit, ætatem sanè beatam, & luminum cælestium feracem. Cum his frequenter versabatur, eorum sermonibus diui-

nisque

nis que colloquijs oblectabatur, ac quamuis in singulis admirabatur virtutes, earum tamen plerasque ipse dudum iam habebat, nonnullas, omnino paribus in se exprimebat lineamentis. Sæpè, id que præcipuè hyemis tempore, ac frigoribus intensissimis vrgentibus, nudis pedibus in templum veniebat, in oratione si quando, noctè maximè profunda somno corripiebatur & premebatur, se in terram abijciebat, ei que superuenienti, non fatigata, sed penè enecta membra inuitus relinquebat. Quàm ille vilia & abiecta, ac prorsus tum ætate, tum gradu parum digna obibat ministeria? Magnam profectò in his animo capiebat voluptatem. Quotiescunque S. Stanislai Episcopi & Martyris gloriosissimi visitabat sepulchrum, quoties S. Salomeæ Reginae Haliciensis, aliorumque sanctorum Cineres & sanctissimas Reliquias inuisebat, semper ad Xenodochia domosque diuersorum pauperum descendebat, vbi mæstis consolationem, infirmis omne obsequium, summa animi alacritate & diligentia præstabat. Otio superuacaneo locum nunquam dedit, vtpote qui tot tantisque Discipulis, Sacræ inquam Theologiæ auditoribus stipatus, alijs responsa dando, cum alijs sapientissimè differendo, maxima dignum commendatione tractabat. transigebatque negotium. Quicquid autem vnquam supererat temporis, hoc totum commentationi scri-

ptioni quæ assiduæ concedebat. Testes sunt, quos super libros Magistri Sententiarum edidit Commentarij omni genere eruditionis plenissimi, in quibus dum & incredibile acumen ingenij, & zelum illius ardentissimum salutis proximi videmus, summum Philosophum & Theologum, præstantissimum Ecclesiasticum Oratorem, perfectum diuinumque Religiosum iure agnoscimus. Hic ergo talis tantusque vir, omninò vitæ præsentis, non certè laborum, qui illi in sancta Religione semper dulces fuerunt, grauitè pertæsus, ad æternam gloriam, patriam inquam suam, ardentius cœpit anhelare. Quæ desideria, vbi magis magisque crescerent, atque hominem DEI præter solitum affligerent, in morbum incidit, quem incredibili subleuabat, tolerabatque patientia. Contigit sanè, & dat veneranda, locuples testimonium antiquitas, vt ea detentus infirmitate, cùm iam quodammodo grauius premeretur, hospites cælestes ad se venientes videret. Etenim SS. DEI Genitrix magno Angelorum comitata choro, puerulum in sinu gestans ad illum venit, vbi etiam S. Stanislaus Episcopus & Martyr Cracouien. S. Hiacynthus, Casimirus Princeps, Heduigis, Salomæa, Kungundis Reginae Poloniae, nonnullique alij sancti interfuerunt. Regina cæli vbi primùm ingressa est, ita illum alloquuta traditur, Esaiâ, inuito te ad

conuiuium Filij mei. Quibus ille verbis mirificè recreatus, postquam sancta & admirabilis visio discessit, & præsentia suæ certissimum testimonium, odorem inquam suauissimum & planè incredibilem reliquit, tum detransitu suo diligentius cogitare, tum solita tanti ac tam periculosi itineris præsidia meditari cepit. Ob eam igitur rem fratribus omnibus ad se vocatis, eis inprimis certam corporis sui resolutionem imminere dixit, ad charitatem deinde mutuam seruandam, cæterarumque virtutum diligens studium ardentè illos est cohortatus. Dicit nequaquam potest, quàm hæc illius verba omnes perculerint. Videbant enim in viro rarissimarum virtutum magnam admirandamque congeriem, videbant Ordinis totius decus & ornamentum singulare, ad summam, perfectionis Religiosæ lucidissimum speculum intuebantur, quo nomine fieri nequaquam potuit, quin acerbissimo ex discessu eius affligerentur dolore. Et quoniam illum Dominus in odorem suauitatis dilexerat, nolebat diutiùs sanctam animam corpore detineri. Moritur ergò vel potiùs ad vitam proficiscitur à morte An. Do. 1471. quo sancta Religio super sepulchrum lapidem grandem, cum eiusdem incisa imagine, tali que inscriptione posuit.

A. D. M. CCCCLXXI. Mens. II. obiit Venerabilis Pater Isaias Sacrae Theologiae Professor. In manu sententiam tenet:

Tempus breue, iudiciumque difficile.

Anno verò Domini 1604. A. R. P. Iacobus Moyski, eiusdem Ordinis nostri in Regno Poloniae Prouincialis, cuius zelum pro domo Domini, parietes ipsi testantur, vir profectò Religiosae disciplinae seruantissimus, augustiori forma erexit, atque tabulam marmoream cum capite ipsius, & tali Epitaphio in pariete proximo adiunxit:

Lechiadum claro prognatus sanguine Doctor

Esaias, isto sarcophago tegitur.

Ne lector mirere, manet sors omnibus vna:

Doctos, indoctos, falsæ metit, vna capit.

Hoc opus & labor, Elisyjs vt sistere campis

Detur, & ad summos scandere cœlicolas.

Viuus ibi semper letus Pater optime, viuus

Esara, nostræ Religionis honor.

Vive memor nostri, vitæ discrimina multa

Inter, ad æternos, duc Pater æme lares.

Erat profectò illius vitæ præclarissimè & sanctissimè actæ, miraculorumque ab illo patratòrum liber per illos Patres, qui cum eo vixerunt diligenter scriptus, sed superiori tempore, quo Cœnobi-um ipsum & templum conflagrauit, vnà cum Bib-

liotheca nobiliſſima, rebusque alijs precioſiſſimis perijt. Venio ergò ad ea miracula, quæ ſiue Chronica diuerſa, ſiue tempora noſtra ſuppeditant. Primum illud eſto:

Cùm adhuc eſſet in viuis, ac quodam tempore ante imaginem B. MARIÆ Virginis, quam ipſe in facello S. Dorotheæ depingi curauerat, diligenter oraret, funus ducebatur Stanislai cuiusdam ciuis Caſimirien. defuncti. Proinde & parentes, & conſanguinei, & vicini mortui deſiſto in choro cadauere, cæptis que de more Officijs Diuinis, certatim ad illum cucurrerunt, atque vt opem ſuis ad DEVM precibus ferret, illum viuum reſtitueret, obnixiſſimè contenderunt. Motus ille tantis hominum lacrymis, ad feretrum vnà cum illis proceſſit, atque in clamatione ad MATREM MISERICORDIÆ:

Monſtra te eſſe MATREM facta, illius manum accepit, ſubleuauit, parentibus, conſanguineis que viuum reddidit.

De altero mortuo per eundem ſuſcitato, ex vita B. Stanislai Caſimiritani Ordinis S. Auguſtini Canonicoꝝ Regularium conſtat. Vir quidam non poſtremæ eruditionis, grauioribus afflictus difficultatibus, ad illius patrocinium conſugit, vbi voto facto, & reportato, Carmen elegans ſcripſit, quo vitam, & nonnulla eius geſta pulchrè fanè

complexus est, atque deinde in Tabula ad sepulchrum affixit. Illud quidem ita se habet.

Magna cano ter magne Deus, Rex maxime Regum,
Digna tuis proprio carmine celicolis.

Adsis o Numen, placido mea marmore duce
Carbasa, nunc Boreas, nunc Zephyri faueant,

Qui imperio tenuit claros toto orbe Polonos:

Magnus ille quidem Rex Casimirus erat.

Quando VIXISTI, quando tua maxima fulsit
Virtus Sauromatis, o Pater Esia.

Quando SCRIPSISTI laudata Volumina doctis,
Plena Deo, rebus plenaq; sydereis.

Quando DIXISTI populo de more frequenti,
Quid Pater altitonans aut vetet, aut iubeat.

Quando FECISTI mortali peruia nunquam
Dextra, ac obstupuit Patria chara tua.

Tu ceci sanasti oculos, ut lumina celi

Optatis vicibus cerneret auricoma.

Tu manco que manus, claudoque pedem inde petenti
Firmaſti, ut posthac ingrederetur ouans.

Strinxerat in quendam ciuem, Casimirus tota
Est testis, gladium perfidia Parca suum.

Flebant vicini, comunx charissima flebat:

Flebant cognati, sat dolor altus erat.

At cum iam tumulo misero, solitoque recondi
Debuit, ut terram terra suam caperet:

Concurrunt omnes ad te, nullo ordine certo :

Quem ante aram inueniunt, flentq̄, rogantq̄ simul :

Vir sancte ESAIA, nunc, nunc memor esto tuorum :

Da vitam in corpus, restituas animam.

Res miranda, Deum quando in tua vota vocabas,

Surrexit viuis sarcophago ille suo.

Occupat inde timor vario discrimine cunctos :

Et clamor celo, quisque Deum celebrat.

Contigit (est certum) ut Veneris charissima proles

Feminei sexus flecteret in tumulto hoc :

Utraq̄ deiecta est mulier, virtute superna,

Quid tibi cum CASTO fetida luxuria?

O quam sepe tuum tumultum circumdedit ingens

Lux, multo Phœbi lampade splendorior!

Sunt qui viderunt, viuunt, testantur vbiuis :

Miramur qui non vidimus vsque satis.

Cetera quid memorem, clamant quoque Demones ipsi :

Et Magnum toties ingeminando, vocant.

Te Magnum cuncti norunt, sanctumq̄ fatentur :

Dum tua facta vident, dum tua scripta legunt.

Ipse ego, qui scribo hæc, ardenti pectore dico :

Dicamq̄, & scribam tempore perpetuo :

ESAIÆ QVICVNQVE VELIS COGNOSCERE FATA:

QVAMQVE DEO CHARVS, CÆLICOLISQVE SVIS:

AD TVMVLVM IPSIVS CVRVATO POPLITE SVPPLEX

PROCIDE, NEC DVBITES EXPERIERIS OPEM.

Expertus scribo, tabulam hanc aspensando futuris

In testem verum (credite) temporibus.

Appendo ex VOTO, Pater optime suscipe vultu

Propitio queso, postea plura canam.

Et quem seruasti toties, totiesq; beasti:

Hunc semper foueat cura paterna tua.

Ver: Ora pro nobis B. P. Esaiam:

Ref: Vt digni efficiamur promissionibus Christi.

O R E M V S.

DEus, qui B. Esaiam Confessorem tuum de mundo, carne, & Diabolo gloriosè triumphantem, ad æterna gaudia fæliciter transtulisti, eum que stola immortalitatis indutum, ac gloria & honore coronatum, ante thronum Maiestatis tuæ semper tibi adstare iussisti, da quæsumus, vt omnes, qui eius pia apud te intercessione imploramus auxilium, benignum præstò sentiamus patrociniû, quatenus amore tuo succensi, pietate feruentes, opere efficares, omnibus periculis sublatis, àèreis que potestatibus debellatis, perpetuò post hanc vitam Angelorum, Sanctorumque tuorum aggregari mereamur consortio. Per Dominum nostrum, &c. Amen.

Anno Domini 1479. Patres eiusdem Cœnobij sæpenumerò tumulum eius luce magna diuinitus circumfusum viderunt, quanquam etiam posteriori etate nonnullis (quorum aliqui viuunt adhuc) eadem fælicitas contigit. Solent id crebris illi testari sermonibus.

Anno Domini 1569. April: 10. aliquot mulieres inhonestę, vtpotè illecebris mundi huius deditę, in tumulto eius temerè satis constiterunt. Neque diu certè ibidem hæserunt. Nam subitò vi quadam ita pulsę abiectęque sunt, vt nulla alia præterquam diuina omninò id factum, præsentibus omnes admirarentur & conclamarent. Transeundo ad Rupellam S. Stanislai Episcopi & Martyris Cracouię. Illustris: & Reuerendis: D. D. Bernardus Episcopus Cracouiensis, itemque Illustris: D. D. Georgius Mniszek, Palatinus Sendomirię: &c. cùm fortè ad orandum propiùs accessissent, factum animaduernerunt, quare etiam, cùm vita huius Beati prima editione scriberetur imprimeturque, dictus Illustris: D. Cardinalis libenter vidit, suaque autoritate comprobauit.

Anno Domini 1603. die 10. Febr: Spectabilis vir, & parentela satis clarus, Ioachimus Fox, ciuis Casimirię: grauissimo periculosissimoque prostratus morbo, ad B. Esaię tumulum votum fecit, gratiam recepit, tabulam cum hoc testimonio appendit:

Religionis honor, decus immortale tuorum:

Purelij magni gloria magna Domus.

Accipe quos potui Charitum decerpere flores:

Parua solent magnis sepe placere viris.

*Ille ego sum, nuper qui (te miserante) fatiscens,
Profiliui morbi de grauiore malo.*

*Tu mea p̄legreō rodentem pectora dente
Fregisti Parcā, tu Pater eximie.*

Hic ego supplicibus palmis te in vota vocaui:

Hinc etiam vite maxima dona tuli.

Hic tibi semper agam grates, semperque litabo:

Esaiā nostri tu memor esto precor.

Adolescens quidam, Petrus Snacki Casimiri-
eñ: infirmitate planè molestissima præuentus &
oppressus: fecit votum, se vbi conualuisset, ad B.
huius viri sepulchrum sacrosanctum Missæ Sacrifi-
cium solenni ritu cantari curaturum, cæreumque
grandem positurum. Absque mora igitur conua-
luit, votum reddidit, tabulam in testimonium gra-
tiæ acceptæ appendit.

Anno Domini 1606. die 10. Febr: Matro-
na honestissima Anna Niedzielanká Casimiriēn:
gravi morbo correpta, imò iam iam morti vicina,
se cum vna Missa votiua, & cæreo grandi, ad B. se-
pulchrum subitò ac vires qualescunque recuperaf-
set, ituram promisit. Neque irritum hoc eius vo-
tum fuit. Nam statim cœpit meliùs habere, & se-
quenti die votum reddidit, tabulamque appendit.

Anno Domini 1607. die 30. Ianu: Nobilis
Christophorus Pravvinski, Serenis: Sigismundi
III. Regis Poloniæ Tympanista, diuturno pedum

dolo-

dolore ita in lecto detinebatur, vt nullis medicamentis, nullis consilijs iuuari, vix loco se mouere posset. At vbi votum cum munusculo careo, vota que Missa ad B. sepulchrum fecit, statim conuuluit, votum reddidit, tabulam appendit.

Anno Dñi 1607. die 4. Febr: Nobilis Stanislaus Lazarzovvski Epilepsia periculosissimè infestabatur. Pater ergò illius, cum prostratum filium aspiceret, ad sepulchrum B. Esaiæ illum se cum careo presentaturum vouit, & mox ita sanitatem impetrauit, votum reddidit, tabulam appendit.

Anno Dñi 1607. die 8. Mart. Simon ciuis Clepardieñ: videns coniugem suam charissimam Heudigem adeò formidabili morbo circumuentam, vt pluribus diebus abstineret à cibo, ad preces S. viri huius confugit, petens, vt suis intercessionibus daret opem. Vouit inter cætera eam cum solenni Missa tumulum sacrum visitaturam, vnde illa sine mora cœpit melius habere, ac postera die votum reddidit, & tabulam appendit.

Anno Dñi 1607. die 1. April: Honestæ Dña Catherina de Casimiria, magnopere à Demonio vexabatur & affligebatur, vtpotè longo temporis intervallo energumena. Hic ad sepulchrũ viri B. intercessiõne eiusdem omninò curata & liberata est.

Anno Domini 1607. die 2. April: Adalbertus Sutor Casimirieñ: & alijs quidem morbis, sed

potissi-

potissimum febris acuta diu satis grauissimè torquebatur. Fecit ergo votum, se cum vna Missa & cæreo sepulchrum visitaturum, vnde citò conualuit, votum reddidit, tabulam appendit.

Anno Domini 1607. die 5. Mart: Honesta matrona Anna Spercina, ciuis Casimirieñ: ad eò periculoso laborabat morbo, vt nulla Medicorum consilia, nulla auxilia illi procederent. Quare parentes ipsius ad diuinam confugerunt opem, eamque se tumulo B. Esaiæ præsentaturos vouerunt, quare etiam citius omnium opinione sanam & incolumem receperunt, votum soluerunt, tabulam in testimonium posteris temporibus acceptæ gratiæ & misericordiæ parieti affixerunt.

Anno Domini 1607. die 9. April: Anna Czapikovyska Casimirieñ: puerum habebat Albertum phtisi, pectorisque graui & diuturna infirmitate afflictum. Non dissimili igitur facta oblatione votiue Missæ in honorem SS. Dei Genitricis apud tumulum B. Esaiæ, citò sanum recepit, votum reddidit, tabulam appendit.

Anno Domini 1607. die 2. Aug: Quidam Augustinus Stokloska ciuis Casimirieñ: lepra valdè deformatus, & à multo tempore capitis dolore grauatus, votum fecit, se, cum munusculo ad dictum sepulchrum venturum, vnde mox sanitate pristina recuperata, & votum soluit, & tabulam appendit.

Anno Domini 1607. die 8. Maij, Samuel Ferlorn Aurifaber & ciuis Cracouieñ : ex platea Arcensi, magna, imò adeò periculosa decumbebat infirmitate, vt à Medicis Doctoribus, post expositam grandem pecuniam desperaretur & relinqueretur. Quocirca vbi humana præsidia non proficiebant, ad Diuina toto sese conuertit animo, nempe cum vno solenni sanctoque Sacrificio vouit se dictum sepulchrum visitaturum, vnde multis admirantibus sanitatem recepit, votum soluit, & tabulam appendit.

Anno Domini 1608. die 10. Iun : Stanislaus Sulkovvicz, famulus A.R.P. Iacobi Moyski, Ordinis nostri Eremit : S. Augustini in Regno Poloniae Prouincialis, cum ex Lituania Cracouiam proficisceretur, ob nimium planè solis æstum in grauem febrim incidit, adeò, vt de vita ipsius dubium esset apud omnes. Facto igitur voto visitandi dictum sepulchrum, ad pristinam redijt sanitatem, votum que reddidit.

Anno Domini 1607. die 14. Maij, Stanislaus Golębiovski ciuis Casimirieñ, per septem hebdomadas infirmum filium Stanislaum habebat, in qua ægritudine ille cibum nullum capiebat, exiguo tantummodo refocillabatur potu. Iamque non parum temporis processerat, quo neque somno, neque vlllo quopiam consilio subleuabatur, imò

pre nimio capitis dolore, in acutissima febre visum amiserat, ad vltimum q̄. vitæ agonem siue certamen venerat, cum interim miser pater flexis genibus votum fecit, nimirum, si pristinæ incolumitati restitueretur, se cum illo monumentum B. Esaiæ visitaturū, Sacrum solenne cantari curaturum, cæreum grandem positurum. Res mira, statim cœpit melius habere, atque vnà cum patre votum reddidit, & tabula appensa intercessione B. viri se conualuisse testatus est.

Anno Domini 1608. die 29. Iul: Anna Milovvska testis est, ancillam suam, post votum factum visitandi hoc sepulchrum, à graui infirmitate liberatam esse.

Anno Domini 1608. vlti: Decemb: Regina Ioannis Zalencki coniunx diu multumq̄e in partu perichitata, tandem mortuum puerū peperit. Vterq̄. igitur, maritus nimirum & vxor luctu & lamentis se se affligentes, Diuinam misericordiã implorabant, ne sibi imputaretur hoc peccatum. Postea ad patrociniū & opem B. Esaię cōfugerunt, suppliciter petentes, quatenus sua ad Deum intercessione puerū illis viuum redderet, vouentes se illū ad sepulchrū cū vna sancta & solenni oblatione, cæreo q̄. maiori, ad mensurā eiusdē, presentaturos. Subitò ergò puer reuixit, oscitare & plangere cœpit, qui ferè tres horas à partu mortuus iacebat. Quare illi vnà cum vi-

cinis læti, beneficij que accepti grati, puerum in primis baptizari, nomen Esaię illi imponi iusserunt, votum deinde soluerunt, tabulam appenderunt.

Anno Domini 1608. die 17. April: Laurentius Leopolięn: adeo graui diuturnoque capitis dolore affligebatur, vt post tot tantaque Medicorum consilia auxilia que inaniter tentata, ad opem denique B. Esaię confugeret. Neque frustra. Nam cum primũ votum fecit, à desperato morbo liberatus ereptusque est.

Anno Dñi 1609. die 12. Mart: Spectabilis vir Ioannes Haler, ciuis & Consul Ilcusien: diuersis quidem temporibus, nõ mediocriter tamen dentiũ dolore premebatur. Cũ autem magis ac magis morbus incretceret, coram me votum fecit, se post recuperatam valetudinem cum argentea tabula, & vna Missa votiuā sepulchrum B. Esaię visitaturum. Itaq. ope cęlesti subleuatus, alacrem se in reddendo voto prestitit, visitauit, tabulamq. dictã acceptę misericordię futuris temporibus testem appendit.

Anno Domini 1609. die 3. Augu: hora 19. Albertus puer annorum quatuor, filius Iosephi Tyranski Architecti & ciuis Casimirien: ad ripam Vistulę, qui tunc vehementer inundauerat, cum alijs sui similibus, vt illa vult ætas, ludebat. Verũ petulantius cursitando, in fluuium incidit, à quo etiam subito absorptus est, ita, vt amplius non appare-

ret. Animaduenterunt casum hunc infelicem Sanctimonialis Ordinis Pœnitentium S. Francisci ex Monasterio ad S. Agnetem, interitumque adeo luctuosum pueruli miseratæ, genibus flexis nomen sanctum Iesus in clamabant, Beatique patris Esaiæ patrocini implorabant. Res admiratione dignissima contigit. Nam puer in medio rapidissimi Vistulæ emerfit, sicque in dorso plus quam per triginta passus sub pontem natauit, ad ripam appulsus denique exanimis à circumstantibus acceptus est. Tum verò mater moestissima, ad sepulchrum B. huius viri eum detulit, suppliciter vitam petijt, & impetrauit. Nam mortuus ibidem reuixit, adhucque viuuit, testimonium veritati dat tabula appensa, & homines qui tunc præsentibus interfuerunt, omniaque tam in fluuio, quam apud sepulchrum gesta viderunt.

Anno Domini 1609. die 17. Septemb. Catharina, Ioannis Zlahanka dicti ciuis & Sartoris Casimiriensis vxor, filiolum vnus anni grauitè infirmam habebat: ita, vt iam animam ageret. Proinde factò voto, ad Ecclesiam se, vt sacrosancto Missæ Sacrificio interesset, contulit, domum deinde reuersa filiolum sanam reperit, subitò tabulam iuxta sepulchrum appendi curauit, votumque soluit.

Anno Domini 1609. die 10. Iun: quidam ciuis Cracouien: filiam suam Heduigem agonizan-

tem videns, fecit votum, quòd, si pristinam recuperasset valetudinem, cum vna Missa B. Patris visitaret sepulchrum. Conualuit igitur illa absque mora, votum reddidit, & tabulam appendit.

Anno Domini 1609. Anna filiola Dorotheę Zakrzewvska, iam ferè animam agebat, verùm factò voto ad B. huius sepulchrum, ita citò & integrè conualuit, vt postridie extra lectum esset. Magni viri inprimis eruditiq̃ue tunc interfuerunt, & vehementer admirati sunt, illa votum soluit.

Anno Domini 1610. in Vigilia Ascensionis Domini, Soror S. Francisci Ordinis Pœnitentium ad S. Agnetem Stradomię, nomine Damiana Rogozinska, filia Illu: & Mag: Domini Vicecapitanei moderni Cracouię: morbo subitaneo correpta, febrè q̃ue continua acutissima laborans, cùm per nouem dies morbus ingrauesceret, & omnibus præsentibus, etiam Medicis ipsis, spem vitę ipsius naturali via conseruandę, sanitatisq̃ue pristinę recuperandę eriperet, atque iam vltimum spiritum emissura putabatur, in visione per somnium, virgo quædam apud easdem Moniales S. Agnetis Probationis tempus peragens, quę iam modò Religionis Habitum suscepit, nomine Mariana, (nunc autem Religionis nouo nomine Domitilla) Stadnicka de Zmigrod, intellexit à quodam Religioso in veste nigra, superpilicio desuper induto sibi ap-

parente, ipsam virginem infirmam Damianam, pro cuius etiam salute, hæc altera ante somnium anxia precabatur, non morituram pro tunc, sed breui sanitati pristinæ restituendam, dummodo pro eadem votum fiat, & adimpleatur, vt scilicet visitentur nomine ipsius duo sepulchra sanctorum Dei, nimirum, B. Esaiæ Ordinis Eremitarum S. Augustini apud S. Catharinam Casimiræ, B. Ioannis Cantij ad S. Annam Cracouiæ, & B. Boromæi altare Niepolomicijs, ibidemque Missæ pro infirma præfata absoluantur. Postera igitur die Præfata Monasterij vnà cum R. P. Confessario Marianã seriò examinavit, anné aliquando de his memoratis sanctis quidpiam audiuisset, volens hac ratione cognoscere somnij originem, videlicet ab imaginatione aut à Deo esset: Verùm Mariana respondit, se quidem de duobus dictis scire nonnihil, at de B. Ioanne Cantio penitus nihil vnquam audiuisse, & vbi sit etiam sepultus ignorare. Votum ergò factum est, & solutum, Damiana conualuit.

HYMNVS DE B. ESAIA.

Iste Confessor Domini Beatus:
 Cuius augustum celebramus ortum:
 Hac die celsas meruit Polorum
 Scandere turres.

Qui Deum cęli pietate vera:

Qui pios mores hominum colendo:

Cęli se vitam docuit sequutum:

Angelicamque.

Semper hic castus fuit, & pudicus:

Sobrius semper fuit, & modestus:

Semper eternum memorabat idem

Tempus & horam.

Filius sacrum tumulum frequentat

Cęcus, & claudus, male sanus omnis:

Mortuus fertur, referuntque leti

Vota petentes.

Unde nunc omnes pariter canendo

Vota fundamus, pariter rogando:

O PATER, me tuis miseratus adsis

Esaiia.

Sit salus illi, decus, atque virtus:

Qui supra cęli residens cacumen:

Machinam mundi moderatur ampli:

Trinus & vnus. Amen.

ANTIPHONA.

Ipse palam faciet disciplinam doctrinę suę, & in lege Testamenti Domini gloriabitur. Collaudabunt multi sapientiam eius, & vsque in seculum non delebitur. Eccles: 39.

Ver: Ora pro nobis Beate Efaia:

Ref: Vt digni efficiamur promissionibus Christi.


O R E M V S.

DEus, qui Ecclesiam tuam, sanctitate & virtutibus B. Efaiae foecundasti, concede propitius, vt eius pia intercessione, cunctorum remissionem accipiamus peccatorum: Qui viuis & regnas, &c.

L A V S D E O,
V I R G I N I Q V E M A T R I.



Biblioteka Jagiellońska



std:0034317

